

**NO SOALAN :52**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATUK RAIME BIN UNGGI  
(TENOM)**

**PERTANYAAN : LISAN**

**TARIKH : 15.06.2015**

**Y.B. DATUK RAIME BIN UNGGI [ TENOM ]** minta **MENTERI KEWANGAN** menyatakan kesan pelaksanaan Cukai Barang dan Perkhidmatan (GST) yang dilancarkan sejak 1 April 2015 lalu, bagi kos sara hidup golongan berpendapatan rendah, menengah rendah, menengah atas dan mewah.

**JAWAPAN**

Tuan Yang Dipertua,

Model GST di Malaysia mampu menjadikan sistem percukaian lebih adil

serta berpotensi menjana hasil yang mapan demi memastikan kedudukan kewangan Negara lebih teguh dalam jangka masa panjang untuk membiayai pembangunan ekonomi bagi manfaat segenap lapisan rakyat. Ini memandangkan GST tidak membebankan golongan berpendapatan rendah di mana keperluan asas seperti pelbagai makanan dan perkhidmatan asas yang digunakan oleh golongan berpendapatan rendah tidak dikenakan GST. Oleh itu, Struktur GST yang akan dilaksanakan di Malaysia adalah bersifat progresif dan bukan regresif kerana kepentingan golongan berpendapatan rendah sentiasa dilindungi di bawah GST. Secara amnya, hanya barang mewah (luxury items) yang lazimnya diguna oleh golongan berpendapatan tinggi adalah tertakluk kepada GST pada kadar 6%. Adalah jelas dan nyata bahawa sistem GST yang dilaksanakan di Malaysia tidak membebankan golongan berpendapatan rendah dan warga tua kerana sebahagian besar perbelanjaan golongan ini ke atas barang dan perkhidmatan asas telahpun diberikan kadar sifar atau dikecualikan. Ini bermaksud barang dan perkhidmatan asas seperti beras, gula, tepung, sayuran, daging, ayam, telur ayam dan ikan, bekalan air dan elektrik, perkhidmatan pengangkutan awam, pendidikan dan kesihatan, pembelian dan penyewaan rumah kediaman tidak dikenakan GST. Lanjutan daripada pelbagai maklum balas

yang diberikan, Kerajaan telah meluaskan skop barang dan perkhidmatan yang tidak dikenakan GST. Antara penambahannya adalah:

- Semua jenis buah-buahan tempatan dan diimport;
- Roti putih dan roti wholemeal,
- Serbuk kopi, serbuk teh dan serbuk koko;
- Mi kuning, kue tiau, laksa danbihun;
- Susu formula bayi bagi kategori umur 0 hingga 36 bulan meliputi semua jenis perisa;
- Ubat-ubatan Penting Nasional diperluaskan daripada 2,900 jenama kepada 4,215 jenama ubat yang meliputi semua kekuatan dan bentuk dosej bagi 320 entiti kimia;
- Buku teks, buku rujukan, kamus, buku latihan kitab agama, suratkhabar, buku bergambar, buku lukisan dan buku mewarna kanak-kanak diperluaskan kepada semua bahan bacaan kecuali majalah dan buku yang bukan bahan bacaan; dan
- Surat khabar.

Selain itu, Kerajaan juga bersetuju menaikkan kadar penggunaan

elektrik yang tidak dikenakan GST daripada 200 unit kepada 300 unit pertama dan memberi manfaat kepada 70 peratus isi rumah di seluruh negara. Jualan runcit minyak petrol RON 95, diesel dan LPG juga diberikan pelepasan daripada GST.

Walaupun langkah tersebut akan menyebabkan golongan kaya juga mendapat manfaat yang sama, namun terbukti peratusan penggunaan golongan kaya terhadap barang dan perkhidmatan tersebut adalah kecil berbanding golongan berpendapatan rendah. Disamping itu, kajian yang telah dibuat menunjukkan kesan tambahan perbelanjaan dengan pelaksanaan GST ke atas golongan berpendapatan RM8,000 sebulan ke atas adalah sebanyak RM290.00 sebulan atau 4.14%. Ini bermaksud langkah yang diambil dengan tidak mengenakan GST ke atas barang keperluan dan perkhidmatan asas akan menguntungkan golongan berpendapatan rendah kerana jumlah pendapatan boleh guna mereka secara amnya tidak terjejas. Ini terbukti bahawa GST tidak membebankan golongan berpendapatan rendah dan bersifat progresif kerana kajian corak perbelanjaan menunjukkan golongan berpendapatan rendah menyumbang kutipan GST yang lebih kecil berbanding dengan golongan berpendapatan

**lebih tinggi.**